

1 Julai 2010 (Khamis)

Jawatan Pengarah GLC dihadkan

Oleh MOHAMAD SHOFI MAT ISA pengarang@utusan.com.my

KUALA LUMPUR 1 Julai - Pengarah syarikat milik kerajaan (GLC) hanya dibenarkan memegang jawatan Ahli Lembaga Pengarah tidak lebih daripada lima buah syarikat tersenarai dan 10 buah syarikat tidak tersenarai pada satu-satu masa. Perdana Menteri, Datuk Seri Najib Tun Razak berkata, jumlah itu ditetapkan melalui Jawatankuasa Putrajaya bagi Prestasi Tinggi GLC (PCG) di bawah garis panduan Buku Hijau berkaitan mempertingkatkan keberkesanan Lembaga Pengarah. "Jumlah itu lebih rendah berbanding had maksimum yang telah ditetapkan oleh Syarat Penyenaraian Bursa Malaysia yang mengehadkan keanggotaan seseorang pengarah itu di 10 buah syarikat tersenarai dan 15 syarikat tidak tersenarai," katanya yang juga Menteri Kewangan pada sidang Dewan Rakyat hari ini. Beliau berkata demikian dalam jawapan bertulis kepada **Lim Lip Eng (DAP-Segambut)** yang mahu kerajaan menyatakan senarai nama pegawai kanan dalam GLC termasuk Pengurus, Ketua Pegawai Eksekutif (CEO) yang memegang lebih daripada satu jawatan pada satu-satu masa. Lip Eng juga mahu kerajaan menyatakan adakah terdapat cadangan untuk melantik pegawai kanan tersebut melalui iklan dan sekiranya tiada mengapa tidak dilaksanakan.

Mengulas lanjut, Perdana Menteri berkata, menurut garis panduan di bawah Buku Hijau, GLC secara amnya telah pun merangka model penggantian masing-masing. "Berdasarkan model ini, GLC melaksanakan pelan penggantian CEO secara proaktif. Di samping itu, GLC seperti syarikat multinasional lain turut menggunakan khidmat firma pencarian eksekutif yang berpengalaman sebagai salah satu amalan terbaik syarikat," katanya. GLC juga katanya, telah menghimpunkan kumpulan kepimpinan pelapis dalaman yang memiliki pengalaman serta kemahiran tertentu yang mampu menyumbang ke arah kelangsungan operasi syarikat. Menurutnya, kriteria yang sama turut digunakan sekiranya syarikat-syarikat itu mahu mencari bakat-bakat yang sesuai daripada industri. "Sehubungan itu, keperluan untuk mengiklankan kekosongan jawatan-jawatan tersebut dalam akhbar tempatan tidak timbul dalam usaha memenuhi sebarang kekosongan yang mungkin ada di GLC. "Selain itu, amalan mengiklankan kekosongan untuk jawatan-jawatan kanan syarikat juga tidak dilakukan oleh syarikat-syarikat multinasional dan besar yang lain," katanya.

3 Julai 2010 (Sabtu)

Rencana - Jambatan menghubungi Malaysia-Indonesia

SARANAN SALLEH

TIDAK berapa dulu pada 18 Ogos 2009, suatu cadangan yang bakal membawa manfaat kepada kedua-dua negara, Malaysia dan Indonesia telah dibentangkan kepada kerajaan. Cadangan tersebut ialah pembinaan 48.7 km jambatan merentasi Selat Melaka yang menghubungi Pulau Ruput di Riau, Indonesia dan Teluk Gong di Melaka. Projek yang bernilai RM44 bilion itu bakal dibiayai oleh Export-Import Bank of China yang sanggup membiayai sehingga 85 peratus kos pembinaan. Bakinya akan datang daripada dana ekuiti dan sumbangan daripada kumpulan terpilih. Idea asalnya dicadangkan oleh bekas Perdana Menteri, Tun Dr. Mahathir Mohamad dalam tahun 1995 lagi tetapi krisis kewangan Asia pada tahun 1997/98 telah menghalang pelaksanaannya. Sesuatu projek mega yang begitu besar tentu mempelawa pelbagai reaksi. Ada yang mengatakan projek ini tidak mendatangkan apa-apa faedah kerana tidak berdaya maju (*viable*) memandangkan kos yang begitu tinggi dan masa mengaut balik pelaburan yang begitu lama. Bayaran yang mungkin dikenakan ialah dalam lingkungan RM300.

Sebanyak 15,000 kenderaan dianggarkan menggunakan laluan ini sehari. Bagaimanapun kajian keseluruhannya belum lagi lengkap dan angka-angka yang dianggarkan mungkin berubah. Sejak 10 tahun yang lalu terdapat sembilan jambatan sebegini yang telah dibina di China. Syarikat perekut utama untuk projek ini ialah The Hunan Provincial Communications Planning, Survey and Design Institute (HNDI) daripada selatan China yang mempunyai pengalaman luas dalam mereka bentuk struktur besar jenis ini. Antara pendapat yang disuarakan ialah projek ini sesuatu yang merugikan dan mengambil masa yang lama untuk pembinaan iaitu sembilan tahun. Semestinya bagi projek sebesar ini tentulah beberapa kajian telah dijalankan. Setakat ini dua kajian kesesuaian telah dijalankan, satu daripada China dan yang kedua daripada perunding Belanda. Tiga lagi kajian akan dilakukan. Dari segi potensi, jambatan ini bakal membuka pelbagai jenis peluang bukan saja ekonomi antara kedua-dua negara tetapi politik dan sosial. Dari sudut politik, 'penyeberangan' ini akan mengubah suasana politik antara negara-negara sempadan Malaysia, Indonesia, Singapura dan Thailand.

Kerjasama antara kerajaan membanteras lanun akan dapat memantau kapal-kapal yang menggunakan selat yang paling sibuk di dunia. Di mana-mana tempat pertemuan pembinaan akan menyaksikan peningkatan pelaburan yang bakal membawa kestabilan politik di antara negara-negara sempadan. Jembatan ini bakal menyemarakkan lagi semangat ASEAN dan menyatukan rantau ini ke arah penyatuan dan kemajuan. Dari sudut sosial, hubungan beribu tahun antara Malaysia dan Indonesia akan dapat membawa penyatuan pertukaran maklumat, teknologi, kesenian dan kebudayaan kepada kedua-dua negara. Masyarakat baru akan terbentuk sekitar bandar-bandar berdekatan yang menyaksikan pembangunan industri dan perdagangan. Sumatera yang mempunyai seramai 70 juta penduduk kaya dengan sumber alamnya akan membuka pencapaian kepada ekonomi gergasi negara China. Semenanjung Malaysia yang terkenal dengan industri perkhidmatannya akan memperolehi peningkatan dalam pelancongan, dagangan dua hala, pembangunan pengangkutan dan pelaburan dalam pendidikan. Hubungan Indonesia dengan Asia akan meningkatkan faedah kepada negeri China, Singapura dan Thailand. Kalau diandaikan Sumatera mempunyai 10 peratus daripadanya golongan kaya, ini bererti peluang meningkatkan lagi pelancongan akan berlipat ganda. Melaka pula mempunyai 800,000 penduduk dan 40,000 kenderaan.

Riau di sebelah Indonesia adalah rantau kedua terkaya dengan minyak dan gasnya dan ini telah disokong oleh minyak kelapa sawit. Bagaimanapun pembangunan di Riau telah terhalang disebabkan oleh infrastruktur yang lemah. Riau juga bakal membangun dengan penyambungan jalan antara Pekanbaru dan Dumai. Dengan banyaknya pembangunan prasarana diperlukan di Riau, syarikat pembinaan kita yang berpengalaman bakal boleh turut serta dalam pembangunan tersebut. Bagi Melaka, ini menyediakan peluang kepada Teluk Gong dan kawasannya untuk membangun dan membentangkan banyak peluang perniagaan bagi rakyat tempatan. Sekian lama penyeberangan yang begini telah banyak dibangunkan di keliling dunia, termasuk di China. Teknologi pembinaan yang menggunakan kabel dan struktur tergantung ini telah dihalusi dan lebih canggih. Mungkin mereka yang memberikan pandangan negatif kepada projek ini tidak melihat kelebihan utamanya iaitu merapatkan lagi rumpun Melayu serantau.

Kalau dalam ASEAN, dagangan kita dengan Singapura yang tertinggi sekali dan banyak dibantu oleh tambak Johor, dengan adanya penyeberangan ini kemajuan di bidang ekonomi bagi kedua-dua buah negara bakal meningkat berlipat kali ganda. Bagaimanapun pihak Singapura melalui Temasek Holdings menyokong penuh projek ini dan bakal menguntungkan mereka juga. Ahli perniagaan Malaysia sedar betapa kecilnya pasaran negara kita dengan penduduk berjumlah dalam lingkungan 10 peratus daripada penduduk Indonesia. Dengan hajat kita untuk mencapai pertumbuhan dalam lingkungan 6 peratus setahun untuk mencapai matlamat pendapatan tinggi, projek ini dilihat sebagai salah satu prasarana yang bakal menyumbang ke arah pertumbuhan tersebut. Suatu perkara penting yang perlu ditekankan supaya orang ramai tidak salah sangka ialah segala pembiayaan projek ini ditanggung oleh sektor swasta dan tidak melibatkan wang rakyat. Kerajaan tempatan Riau dan kerajaan negeri Melaka memberikan sokongan yang padu kepada projek ini.

DATUK SALLEH MAJID ialah bekas Presiden Bursa Saham Kuala Lumpur (kini Bursa Malaysia).

5 Julai 2010 (Isnin)

Pelajar luar negara boleh dapat PR

PUTRAJAYA 5 Julai - Kementerian Pengajian Tinggi akan mengkaji cadangan untuk menawarkan pemberian taraf penduduk tetap (PR) kepada pelajar dari luar negara sebagai langkah menggalakkan pelajar berkenaan berkhidmat di negara ini sebaik menamatkan pengajian. Menterinya, Datuk Seri Mohamed Khaled Nordin berkata, pemberian PR itu bukan untuk semua pelajar sebaliknya kepada penuntut yang sedang melanjutkan pengajian peringkat Sarjana dan doktor falsafah (PhD) serta yang ditaja kementerian. "Mungkin kita akan tawarkan mereka berkhidmat sebagai pensyarah atau penyelidik tetapi penawaran bukan kepada semua pelajar sebaliknya pelajar yang benar-benar kreatif serta berkemahiran," katanya kepada pemberita di sini hari ini. Beliau berkata, di samping usaha untuk menarik minat rakyat tempatan kembali berkhidmat di negara ini, usaha menarik minat rakyat luar berkhidmat di Malaysia juga perlu. "Kita tidak boleh menghalang rakyat tempatan berkhidmat di negara lain, sekarang kita kena bertindak secara adil dan jujur dengan berusaha mencari bakat dari negara luar pula," katanya.

5 Julai 2010 (Isnin)

MIDA luluskan RM412.9 bilion pelaburan sejak 1998

KUALA LUMPUR 5 Julai - Lembaga Kemajuan Perindustrian Malaysia (MIDA) meluluskan pelaburan berjumlah RM412.9 bilion bagi tempoh 1998 hingga April. Menteri Pedagangan Antarabangsa dan Industri, Datuk Seri Mustapa Mohamed berkata, pelaburan tersebut adalah dalam sektor perkilangan dan perkhidmatan berkaitan perkilangan. "Daripada jumlah itu, RM244.8 bilion (59.3 peratus) merupakan pelaburan langsung asing (FDI) manakala RM168.1 bilion (40.7 peratus) merupakan pelaburan tempatan (DDI)," katanya ketika menjawab soalan William Leong Jee Keen (PKR-Selayang) pada persidangan Dewan Rakyat hari ini mengenai jumlah pelaburan langsung yang diterima Malaysia, serta punca pelaburan tempatan kurang berbanding FDI. Mustapa berkata, Malaysia merupakan antara penerima FDI terbesar berdasarkan promosi dan galakan FDI yang dijalankan secara komprehensif oleh kerajaan selain penumpuan terhadap industri bertechnologi tinggi yang tidak terdapat di peringkat tempatan.

"Pada masa yang sama, kerajaan juga tidak mengabaikan kepentingan pelaburan domestik kepada pembangunan ekonomi negara," katanya. Beliau juga berkata, pelaburan tempatan mengatasi FDI pada tahun 2004 dan 2006. Antara sebab pelaburan tempatan terhad berbanding FDI ialah pergantungan terhadap kebolehupayaan pengeluaran produk dan perkhidmatan yang kreatif, bernilai tambah dan inovatif, serta kebolehan mengaplikasikan teknologi tinggi dalam menjalankan aktiviti penyelidikan dan pembangunan, selain kemudahan mendapatkan kredit kewangan daripada pihak bank. Justeru katanya, dalam meningkatkan pelaburan domestik, beberapa langkah telah dikenal pasti termasuk membantu dan memudahkan syarikat domestik, termasuk syarikat berkaitan kerajaan yang mempunyai kapasiti untuk memperluas operasi ke dalam bidang-bidang pertumbuhan yang berpotensi. - Bernama

8 Julai 2010 (Khamis)

Kerajaan wujud Perbadanan Stadium Malaysia

KUALA LUMPUR 8 Julai - Kerajaan akan mewujudkan Perbadanan Stadium Malaysia yang bertanggungjawab membangun, mengendali dan menguruskan stadium, kompleks dan kemudahan sukan di negara ini. Berdasarkan Rang Undang-Undang Perbadanan Stadium Malaysia 2010 yang dibentangkan untuk bacaan kali pertama di Dewan Rakyat hari ini, perbadanan berkenaan akan diketuai oleh Pengurus dan Ketua Pegawai Eksekutif. Anggota perbadanan yang lain ialah lima orang yang dilantik Kerajaan Persekutuan, lima wakili organisasi sukan dan lima lagi yang berpengalaman dalam pembangunan, pengendalian dan pengurusan stadium. Fungsi perbadanan berkenaan antaranya mempromosi stadium dan kompleks sukan di peringkat kebangsaan dan antarabangsa sebagai tempat serbaguna untuk acara sukan, rekreasi, kebudayaan, pendidikan, komersial dan hiburan.

Ia juga bertanggungjawab menyediakan kemudahan dan perkhidmatan bersifat komersial seperti tempat penginapan sebagai pelengkap kepada stadium dan kompleks sukan berkenaan. Rang undang-undang itu yang dibentangkan oleh Menteri Belia dan Sukan, Datuk Ahmad Shabery Cheek turut menggariskan peranan perbadanan itu untuk mengadakan kerjasama dengan pelbagai pihak bagi membangunkan kemudahan pendidikan, perubatan dan penyelidikan berkaitan sukan.

Ia juga mempunyai kuasa membuat kajian mengenai kemungkinan membangunkan semula stadium dan kompleks sukan berkenaan. Perbadanan juga boleh menubuhkan syarikat di bawah Akta Syarikat 1965 untuk mengendali dan menguruskan projek, skim dan perusahaan yang telah dirancang. Dalam perkembangan berkaitan, rang undang-undang berkenaan akan memansuhkan Akta Perbadanan Stadium Merdeka 1963 dan membubarkan Perbadanan Stadium Merdeka.

9 Julai 2010 (Jumaat)

Kontraktor baru bersih runtuhan Stadium Sultan Mizan

KUALA LUMPUR 9 Julai - Kontraktor baru telah dipilih bagi pembersihan runtuhan Stadium Sultan Mizan di Gong Badak, Kuala Terengganu dalam tempoh lima bulan, kata Setiausaha Kerajaan Negeri Terengganu, Datuk Mazlan Ngah. "Ia memerlukan masa kerana kerjanya amat rumit. Kita tidak mahu apabila mereka mengalihkan runtuhan tersebut ia akan merosakkan struktur stadium itu sendiri," katanya kepada pemberita selepas merasmikan majlis prapelancaran Festival Gamelan Sedunia 2010 di sini hari ini. Menurutnya lagi, kontraktor baru yang dipilih hanya akan menjalankan kerja pembersihan manakala kontraktor untuk kerja membaik pulih hanya akan dipilih selepas kerja pembersihan dibuat. "Kami juga akan membincangkan kos-kos membaik pulih tersebut setelah kerja-kerja pembersihan selesai dibuat," tambahnya.

Bumbung stadium tersebut runtuh pada Jun tahun lepas, selepas disiapkan pada Mei 2008, dengan kos RM270 juta. Kontraktor baru untuk pembersihan itu diputuskan oleh Lembaga Tender Negeri yang bermesyuarat dua hari lepas namun nama syarikat belum didedahkan kerana masih belum terima tawaran. Mengenai tindakan terhadap kontraktor sebelum ini yang gagal menyiapkan kerja-kerja dalam tempoh yang ditetapkan, Mazlan menjawab: "Tindakan yang diambil adalah seperti mana dalam kontrak".

11 Julai 2010 (Ahad)

Pasir di Dengkil pula dikorek

Oleh AZIAN AZIZ pengarang@utusan.com.my



Mohd. Khir Toyo meninjau kawasan lombong pasir dekat Paya Indah Wetlands, Dengkil, semalam. - BERNAMA

SEPANG 11 Julai - Kegiatan melombong pasir di Selangor semakin tidak terkawal apabila 20 hektar tanah yang terletak kira-kira 50 meter dari taman rekreasi Paya Indah Wetlands di Dengkil diceroboh untuk mendapatkan hasil tersebut. Aktiviti yang dipercayai di atas tanah milik kerajaan itu berlangsung sejak dua minggu lalu dan dikatakan 10 juta tan metrik pasir dianggarkan bernali RM220 juta sudah dikorek. Dipercayai ia bukan satu-satunya kawasan tanah milik kerajaan yang diceroboh. Bekas Menteri Besar, Datuk Seri Dr. Mohamad Khir Toyo yang mendedahkan perkara itu bimbang jika kegiatan tersebut tidak dihentikan, tanah di Selangor akan dipenuhi lubang yang sukar dipulihkan.

Mohamad Khir yang membawa sekumpulan pemberita ke tempat kejadian melahirkan perasaan kesal dengan kegiatan itu dan mendesak kerajaan negeri berbuat sesuatu bagi menyelamatkan kawasan rekreasi itu. Beliau khuatir ekosistem kawasan yang menjadi habitat unggas dan haiwan liar itu akan terganggu dan tapak rekreasi yang menjadi salah satu produk pelancongan di Selangor akan musnah kerana kerakusan kegiatan melombong pasir. "Saya hairan mana perginya Elizabeth Wong (Exco Alam Sekitar) dan pertubuhan bukan kerajaan (NGO) yang selama ini mempertahankan alam sekitar? "Jika dibiarkan, saya bimbang lebih banyak lombong akan dikorek dan kawasan Paya Indah Wetlands hanya tinggal nama," katanya yang turut ditemani Ahli Dewan Undangan Negeri (ADUN) Kuala Kubu Bharu, Wong Koon Moon dan ADUN Pelabuhan Klang, Badrul Hisham Abdullah.

Sementara itu, seorang penduduk Kampung Bukit Changgang, Bahaman Ahmad Jiman, 39, yang ditemui di tempat kejadian berkata, dia mengesyaki berlaku kegiatan mengorek pasir berdekatan Paya Indah Wetlands apabila banyak lori pasir keluar masuk ke kawasan itu melalui Kampung Olak Lempit di sini. Untuk mengesahkan perkara itu, Bahaman yang juga pengurus pertubuhan belia kampung itu pergi sendiri ke kawasan tersebut dan terkejut melihat hutan seluas 120 hektar telah ditebang dan terdapat kawasan lombong yang baru digali seluas 20 hektar di kawasan itu. "Saya terkejut kerana kawasan yang dikorek terletak berhampiran habitat semula jadi haiwan liar dan sepatutnya aktiviti seperti ini tidak dibenarkan. "Saya bercadang melaporkan perkara ini kepada pihak berkuasa agar tindakan susulan dapat dilakukan dan tanah di Paya Indah Wetlands ini dapat diselamatkan," katanya.

Menurutnya, kegiatan mengorek pasir itu begitu pantas hingga dalam masa dua minggu kawasan seluas itu dikorek menjadi lombong yang besar dan dalam. Seorang lagi penduduk, Alfian Kasmin, 37, pula kesal kerana kawasan Paya Indah Wetlands yang sebelum ini sering dikunjungi penduduk kampung berdekatan untuk memancing dan melihat unggas cuba dimusnahkan dengan kewujudan lombong pasir. Dia juga menyatakan rasa tidak puas hati terhadap kerajaan negeri kerana kegiatan itu dijalankan secara berleluasa tanpa kawalan. "Kawasan lombong bersebelahan tanah yang dikorek merupakan pusat menternak ikan tilapia, keli dan baung oleh pertubuhan belia di sini.

Kawasan itu telah tercemar kerana aktiviti mencuci pasir menyebabkan minyak masuk ke kolam ternakan. "Peluang untuk melihat pelbagai jenis unggas singgah di kawasan rekreasi ini juga sudah tertutup kerana ekosistem di sini sudah diganggu," katanya. Bagi Mokhtar Mokhsin, 57, pula, kegiatan melombong yang tidak terkawal boleh mengancam keselamatan penduduk di kampung berdekatan kerana kejadian tanah runtuh dan jerlus mungkin berlaku. Malah katanya, kemunculan terlalu banyak lori mengangkut pasir juga menyebabkan keselamatan penduduk terutama kanak-kanak terancam kerana kenderaan itu kadang kala dipandu secara melulu. "Saya minta kerajaan negeri jangan tutup mata terhadap perkara ini kerana kegiatan mengorek pasir tanpa kawalan nampaknya tidak menguntungkan kerajaan negeri dan rakyat," katanya.

Sementara itu, tinjauan pemberita di tempat kejadian mendapati lebih 10 jentera pengorek digunakan untuk melombong pasir. Semasa tiba di kawasan tersebut kira-kira pukul 12.30 tengah hari ini, kumpulan pemberita yang dibawa oleh Mohamad Khir mendapati kawasan yang diceroboh lengang dan tiada aktiviti melombong dijalankan. Beberapa pekerja lombong yang sedang berehat di sebuah pondok yang dibina di kawasan bukit berhampiran tidak memberikan sebarang reaksi semasa ditemui pemberita. Bagaimanapun, dua kenderaan pacuan empat roda yang membawa beberapa ekor anjing dipercayai tonto kepada kontraktor pasir melihat dari jauh gerak geri kumpulan pemberita.

12 Julai 2010 (Isnin)

Korek pasir masih berterusan

Oleh NAZMIL NASIRUDDIN dan THOMAS CHONG pengarang@utusan.com.my



LORI membawa pasir masih keluar masuk di kawasan operasi seperti biasa di Dengkil, semalam.

KUALA LANGAT 12 Julai - Kegiatan mengorek pasir berhampiran taman rekreasi Paya Indah Wetlands dekat Dengkil di sini masih berleluasa walaupun selepas dibongkar oleh pihak media. Tinjauan *Utusan Malaysia* di Jalan Meranti, Kampung Olak Lempit di sini mendapati sebanyak 26 buah lori pasir keluar dan masuk melalui jalan tersebut dalam tempoh 40 minit sahaja. Lori-lori besar tanpa muatan dari arah Dengkil dan Banting didapati memasuki Jalan Meranti di Kampung Olak Lempit dan keluar dari situ selepas dipenuhi dengan pasir. Seorang 'penjaga' ditempatkan di Jalan Meranti untuk mengawal laluan lori yang bergerak dari kedua-dua arah di jalan itu.

Penduduk memberitahu *Utusan Malaysia*, pihak yang mengorek pasir turut menempatkan tonto yang meronda di sepanjang jalan menuju ke tempat mengorek untuk menghalang orang luar mendekati tapak tersebut. Seorang penduduk kampung yang hanya mahu dikenali sebagai Mak Yah, 52, berkata, kegiatan mengorek pasir di Kampung Olak Lempit telah merosakkan alam sekitar di kampung itu. "Kegiatan mengorek pasir dikesan berlaku di kawasan kampung kira-kira dua bulan lalu, kawasan hutan di kampung menjadi tandus berikutan aktiviti ini. "Aktiviti korek pasir dijalankan secara berleluasa malah ia dilakukan berhampiran kawasan perlindungan di Paya Indah Wetlands," katanya. Akhbar hari ini melaporkan kira-kira 20 hektar tanah yang terletak kira-kira 50 meter dari taman rekreasi Paya Indah Wetlands di Dengkil diceroboh untuk tujuan mengorek pasir.

Sebanyak 10 juta tan metrik pasir dianggarkan bernilai RM220 juta sudah dikorek dan menyebabkan kemasuhan tidak ternilai kepada alam sekitar. Bekas Menteri Besar Selangor, Datuk Seri Dr. Mohamad Khir Toyo yang mendedahkan perkara itu bimbang jika kegiatan tersebut tidak dihentikan, tanah di Selangor akan dipenuhi lubang yang sukar dipulihkan. Mengulas lanjut, Mak Yah berkata, debu menyelubungi Kampung Olak Lempit sejak kerja-kerja penggalian pasir dimulakan dua bulan lalu. Dia yang menetap di kampung itu sejak 1982 memberitahu, Jalan Meranti yang digunakan oleh penduduk kampung sejak sekian lama telah bertukar wajah menjadi jalan yang berlubang dan kotor. "Jalan kampung yang dahulunya elok kini berlubang dan berlopak disebabkan lori-lori yang menggunakan laluan ini untuk mengangkut pasir," katanya. Disebabkan keadaan yang berbahaya, kebanyakan ibu bapa terpaksa menghantar sendiri anak mereka ke sekolah. "Ini bagi memastikan anak-anak mereka tidak terlibat dengan kejadian kemalangan yang tidak diingini. "Penduduk kampung pernah mengemukakan aduan kepada pihak terlibat tetapi masih tidak ada apa-apa tindakan yang diambil ke atas kegiatan ini," kata Mak Yah.

12 Julai 2010 (isnin)

Kerajaan tahu kegiatan lombong pasir - Khalid

SHAH ALAM 12 Julai - Kegiatan melombong pasir dekat taman rekreasi Paya Indah Wetlands, Dengkel, Sepang yang dibongkarkan media semalam sememangnya diketahui kerajaan negeri dan dikendalikan oleh Kumpulan Semesta Sdn. Bhd. (KSSB). Menteri Besar, Tan Sri Abdul Khalid Ibrahim berkata, kegiatan tersebut mempunyai permit sah dan lokasi sebenarnya terletak di Kampung Olak Lempit di Mukim Tanjung 12, Kuala Langat dan bukannya di Bukit Changgang seperti dilaporkan media. Menurut beliau, permit melombong pasir di kawasan itu dikeluarkan pentadbir tanah Kuala Langat sejak Januari 2010 selepas mendapat kelulusan Jabatan Alam Sekitar (JAS), Jabatan Pengairan dan Saliran, Jabatan Kerja Raya, Jabatan Mineral dan Geosains, Lembaga Urus Air Selangor (LUAS), Majlis Daerah Kuala Langat dan Pejabat Daerah dan Tanah Kuala Langat. "Kelulusan dari jabatan ini diperoleh selepas Skim Melombong dan Pengurusan Alam Sekitar (EMP) diluluskan jabatan-jabatan ini. "Operasi melombong dijalankan selepas JAS dan LUAS berpuas hati dengan EMP yang disediakan oleh KSSB. "Antara kandungan EMP adalah operasi perlombongan KSSB tidak menjaskan alam sekitar termasuk di Paya Indah Wetlands," katanya kepada pemberita selepas menghadiri Sidang Dewan Undangan Negeri di sini petang ini.

Beliau mendakwa, syarikat Enviro Enhance Sdn. Bhd., konsultan alam sekitar untuk kerajaan negeri juga bertanggungjawab menghantar laporan setiap bulan kepada JAS. Menteri Besar berkata, KSSB juga menyediakan zon penampang selebar 20 meter dari sempadan kawasan melombong. "Kecerunan tebing yang landai dengan purata 27 darjah disediakan untuk memastikan tebing tidak runtuh dan membahayakan pekerja serta alam sekitar. Ini adalah mengikut Skim Melombong yang memenuhi syarat JMG" Katanya, lombong KSSB ini adalah berkeluasan 120 ekar, bukannya 120 hektar (250 ekar) seperti yang dilaporkan oleh akhbar. Projek yang berjalan kini adalah untuk operasi fasa pertama yang melibatkan kawasan seluas kira-kira 60 ekar (24 hektar), sementara operasi fasa kedua pula sedang dalam proses pembersihan kawasan. Kata beliau, kerja-kerja melombong telah diberikan kepada syarikat kontraktor, Cheong Weng Trading yang berpengalaman selama 15 tahun dalam industri pasir. "Semenjak operasi bermula pada Januari 2010, sebanyak 400,000 tan metrik pasir telah dijual dengan pendapatan sekitar RM7 juta, bukannya 10 juta tan pasir bernilai RM220 juta seperti yang dilaporkan akhbar.

"Adalah tidak munasabah untuk mengeluarkan 10 juta tan pasir dalam masa dua minggu seperti yang dilaporkan kerana untuk mengeluarkan pasir sebanyak itu memerlukan lebih 500,000 muatan lori. "Jentera-jentera dan peralatan melombong (sedia ada) tidak berkemampuan untuk mengeluarkan 10 juta tan pasir dalam masa dua minggu," dakwanya. Tambah beliau, kerajaan negeri berterima kasih kepada mereka yang prihatin dengan kejadian curi pasir dan mencuba sedaya upaya untuk membanteras jenayah ini supaya negeri tidak terus kerugian. Jelas beliau, pentadbir tanah telah mengenal pasti kawasan-kawasan kecurian pasir seluruh Selangor termasuklah di Bukit Canggang dan sedang mengambil tindakan termasuk memberi Notis 7A di bawah Kanun Tanah Negara.

12 Julai 2010 (Isnin)

Gaji pensyarah perubatan dikaji semula

KUALA LUMPUR 12 Julai - Kementerian Pengajian Tinggi akan menilai semula kenaikan gaji pensyarah perubatan dan pensyarah pergigian di institusi pengajian tinggi awam (IPTA) supaya ia dapat diselaraskan dengan pegawai perubatan awam. Timbalan Menteri Pengajian Tinggi, Datuk Saifuddin Abdullah berkata, satu kertas kerja akan dibentangkan oleh kementerian itu untuk memperhalusi kenaikan gaji pensyarah terlibat bagi mengelak mereka berpindah ke sektor swasta. "Golongan pensyarah ini penting untuk sektor perubatan awam kerana ilmu pengetahuan mereka mampu melahirkan doktor pakar yang berkualiti. "Kementerian akan mengkaji perkara ini secepat mungkin dan mengumumkannya setelah kajian mengenai kenaikan gaji itu diselesaikan," katanya kepada *Utusan Malaysia* ketika dihubungi di sini hari ini.

Beliau mengulas cadangan Pensyarah Kanan Unit Kardiologi Jabatan Perubatan, Fakulti Perubatan Universiti Malaya (UM), Dr. Zul Hilmi Yaakob dalam *Forum Utusan Malaysia* hari ini yang meminta kementerian mengkaji kenaikan gaji pensyarah perubatan IPTA jika tidak mahu melihat mereka berpindah ke Kementerian Kesihatan atau sektor swasta. Menurut Zul Hilmi, kenaikan gaji yang sedikit iaitu RM2.10 berdasarkan penambahbaikan jadual gaji matriks (JGM) bagi kenaikan gred DU51-54 adalah tidak setimpal dengan tanggungjawab dan tugas pensyarah tersebut. "Tugas pensyarah perubatan sama seperti doktor lain iaitu mempunyai pesakit, menjalankan prosedur atau pembedahan serta mengajar pelajar perubatan dan bakal pakar perubatan," jelasnya. Pada 23 Mac lalu, Menteri Pengajian Tinggi, Datuk Seri Mohamed Khaled Nordin mengumumkan, kerajaan bersetuju melaksanakan JGM bagi skim perkhidmatan pensyarah perubatan dan pensyarah pergigian di IPTA yang telah berkuat kuasa awal bulan ini. Menurutnya, kementerian menaikkan gaji pensyarah dalam bidang perubatan dan pergigian berdasarkan skim perkhidmatan pensyarah bidang kritikal.

12 Julai 2010 (Isnin)

RM120 juta beli kenderaan baru TNB

KUALA LUMPUR 12 Julai - Tenaga Nasional Berhad (TNB) memperuntukkan RM120 juta untuk menukar kenderaan uzur miliknya dengan kenderaan yang baru. Ketua Pegawai Eksekutifnya, Datuk Seri Che Khalib Mohamed Noh berkata, langkah itu akan dilakukan dalam tiga fasa dengan fasa pertama bermula hari ini. "Bagi fasa pertama, kami telah membeli 521 kenderaan jenis Mitsubishi Triton twincab 4x2, Isuzu Hilux twincab 4x4 serta trak satu tan yang akan diagihkan ke cawangan TNB seluruh negara. "Fasa berikutnya akan dilakukan tahun depan dan kenderaan lama akan kita jual," katanya. Beliau ditemui selepas majlis pelancaran *Buku Poket Prosedur Penyuisan Ring Main Unit (RMU)* dan Penyerahan 521 Kenderaan Pasukan Kerja Kepada Negeri di Wisma TNB Jalan Timur di sini hari ini.

Turut hadir Pengarah Eksekutif TNB, Azman Mohd. dan Naib Presiden, Bahagian Pembahagian TNB, Husin Othman. Pada majlis itu, Che Khalib juga merasmikan *Buku Poket Penyuisan RMU* yang bertujuan meningkatkan tahap keselamatan anggota kerja TNB. Menurut Che Khalib, pembelian itu merupakan kaedah meningkatkan lagi produktiviti pekerja dan perkhidmatan TNB pada masa akan datang. "Dengan kenderaan baru, pekerja dapat meningkatkan daya pengeluaran dan akan mempercepatkan operasi sekali gus dapat memberi servis yang terbaik kepada setiap pelanggan. "Pekerja TNB selalu terdedah dengan tugas berisiko tinggi dan buku tersebut yang bertindak seperti buku manual sangat berguna untuk mengelakkan sebarang kecelakaan semasa bertugas," ujarnya

12 Julai 2010 (Isnin)

Parlimen - Dewan kecoh isu curi pasir

Oleh RAJA SYAHRIR ABU BAKAR pengarang@utusan.com.my

KUALA LUMPUR 12 Julai - Isu kegiatan mengorek pasir secara berleluasa di Selangor menimbulkan kekecohan di Dewan Rakyat hari ini apabila ahli-ahli Parlimen kerajaan dan pembangkang bertikam lidah berkenaan hal itu. Kekecohan berlaku apabila **Datuk Mohamad Aziz (BN-Sri Gading)** dalam soalan tambahannya membangkitkan isu itu dengan mendakwa kegiatan berkenaan bakal merosakkan ekosistem dan keadaan muka bumi di Selangor. "Saya nak bertanya apakah rasional kerajaan Parti Keadilan Rakyat (PKR) Selangor membiarkan kerja-kerja mengorek pasir secara besar-besaran, secara merompak sehingga orang kata Selangor 'negeri berlubang-lubang' hasil kerja rompakan harta rakyat Selangor," katanya. Timbalan Menteri di Jabatan Perdana Menteri, Datuk S.K. Devamany bangkit mencelah dengan berkata: "Saya nak jawab begini, tepuk dada tanya selera, meludah ke langit kena muka sendiri dan harapkan pagar, pagar makan padi." Ketika itu kedengaran suara Dr. P. Ramasamy (DAP-Batu Kawan) menjerit "MIC parti tidak guna" iaitu merujuk kepada parti yang dianggotai Devamany. Timbalan Menteri di Jabatan Perdana Menteri itu serta beberapa Ahli Parlimen Barisan Nasional (BN) yang berang dengan dakwaan itu meminta Ramasamy menarik balik kenyataan tersebut. Selepas itu, **Dr. Dzulkefly Ahmad (Pas-Kuala Selangor)** dan beberapa ahli Parlimen pembangkang dan kerajaan turut bangkit dan terus bertikam lidah sehingga keadaan ditenangkan oleh Timbalan Speaker, Datuk Wan Junaidi Tuanku Jaafar.

Laporan akhbar hari ini menyebut, kegiatan melombong pasir di Selangor semakin tidak terkawal apabila 20 hektar tanah yang terletak kira-kira 50 meter dari taman rekreasi Paya Indah Wetlands di Dengkil diceroboh untuk mendapatkan hasil tersebut. Aktiviti yang dipercayai di atas tanah milik kerajaan itu berlangsung sejak dua minggu lalu dan dikatakan 10 juta tan metrik pasir dianggarkan bernilai RM220 juta sudah dikorek. Terdahulu, Dzulkefly mempertikaikan pemilihan Kwasa Land Sdn. Bhd. untuk membangunkan tanah seluas 3,300 hektar milik Lembaga Getah Malaysia (LGM) di Sungai Buloh secara bersama dengan Kumpulan Wang Simpanan Pekerja (KWSP) dan Kementerian Kewangan. Beliau mendakwa pembangunan sebegini bakal mewujudkan keadaan 'gelembung harta tanah' (property bubble) iaitu situasi lebihan harta tanah sehingga menyebabkan harganya di pasaran menjunam. Devamany berkata, pemilihan Kwasa Land dalam projek itu adalah kerana syarikat berkenaan memiliki kedudukan kewangan yang kukuh. Selain itu jelasnya, KWSP menguasai pegangan saham syarikat itu sebanyak 80 peratus, sementara 20 peratus lagi pegangannya dimiliki oleh Kementerian Kewangan. "Melalui cadangan (projek) ini, KWSP menyasarkan peningkatan pelaburan dalam bidang harta tanah daripada dua peratus kepada lima peratus," ujarnya.

12 Julai 2010 (Isnin)

Kontraktor gagal siapkan projek akan disenarai hitam

KUCHING 12 Julai - Kementerian Kerja Raya tidak akan teragak-agak untuk mengambil tindakan tegas termasuk menyenarai hitam kontraktor di negeri ini yang gagal menyiapkan projek mengikut jadual yang ditetapkan. Timbalan Menterinya, Datuk Yong Khoon Seng berkata, setakat ini terdapat dua atau tiga projek 'sakit' di Sarawak, namun belum ada lagi kontraktor di bawah kementeriannya disenarai hitam atas kegagalan mereka menyiapkan projek mengikut jadual yang ditetapkan. "Setakat ini, kita masih memberi peluang dengan melanjutkan tempoh menyiapkan projek 'sakit' berkenaan dan menghulurkan bantuan teknikal kepada mereka. "Namun sekiranya mereka masih gagal menyiapkan projek itu walaupun setelah diberi amaran dan lanjutan tempoh tarikh penyiapan projek itu, kita tidak akan teragak-agak menyenaraihitamkan mereka," katanya selepas menyempurnakan program Mesra Rakyat 'Pemimpin Turun Desa' di Dewan Perpaduan, RPR Batu Kawa di sini semalam.

Beliau berkata demikian kepada pemberita ketika ditanya mengenai tindakan kementerian sama ada akan mengambil tindakan menyenaraihitamkan kontraktor di negeri ini yang gagal menjalankan kerja mengikut kontrak. Turut hadir, Pengerusi Majlis Perbandaran Padawan, Lo Khere Chiang; Timbalan Pengarah KEMAS, Azrul Adi Philip Abdullah dan Ketua Pemuda Parti Rakyat Bersatu Sarawak (SUPP), Sih Hua Tong. Khoon Seng yang juga Ahli Parlimen Stampin berkata, Kementerian Kerja Raya akan memantau rapi setiap projek 'sakit' supaya dapat dilaksanakan dengan baik. Namun jelasnya, jika kontraktor berkenaan masih gagal menyiapkan projek itu kementerian akan bertindak membatalkan kontrak mereka bagi membolehkan ia ditender semula. "Justeru kita sentiasa memberi jaminan bahawa projek-projek 'sakit' di seluruh negara diberi keutamaan untuk disiapkan," katanya. Sementara itu, Khoon Seng turut mengumumkan geran RM5,000 kepada Jawatankuasa Kemajuan dan Keselamatan Kampung (JKKK) RPR Batu Kawa untuk menjalankan pelbagai aktiviti yang telah dan akan dirancangkan sepanjang tahun.

13 Julai 2010 (Selasa)

Ekosistem Taman Rekreasi Wetlands terjejas

KUALA LUMPUR 13 Julai - Ekosistem dan struktur permukaan Taman Rekreasi Paya Indah Wetlands di Dengkil boleh terjejas jika kegiatan melombong pasir di kawasan itu tidak dihentikan. Ketua Pusat Penyelidikan Alam Sekitar, Universiti Teknologi Mara (UiTM), Prof. Dr. Ku Halim Ku Hamid berkata, kerja-kerja memusnahkan alam sekitar mampu dijalankan dalam sekilip mata berbanding usaha memulihkannya semula yang mengambil masa puluhan tahun. "Perbuatan rakus manusia ini akan memberi kesan buruk terhadap alam sekitar dan merencatkan ekosistem permukaan bumi terutama hidupan akuatik di kawasan terlibat. "Akibat perbuatan tersebut, aliran sungai menjadi cetek dan keruh kerana terdapat zarah-zarah pepejal pasir di dalamnya, umumnya ia tidak kelihatan dengan mata kasar," katanya kepada *Utusan Malaysia* ketika dihubungi di sini hari ini. Menurutnya, kesan buruk terhadap Taman Rekreasi Paya Indah Wetlands akan menjadi lebih teruk lagi dalam jangka masa panjang seperti gegaran-gegaran kecil dan mendapan tanah kerana operasi melombong pasir itu melibatkan lori yang berat.

Beliau mengulas kegiatan mengorek pasir berhampiran Taman Rekreasi Paya Indah Wetlands dekat Dengkil yang masih berleluasa walaupun selepas dibongkar oleh pihak media. Sementara itu, Presiden Persatuan Pencinta Alam Malaysia (MNS), Tan Sri Dr. Salleh Mohd. Noor juga tidak bersetuju dengan tindakan melombong pasir di kawasan rekreasi tersebut. "Seharusnya kajian penilaian alam sekitar oleh pakar-pakar geologi perlu dibuat terlebih dahulu sebelum membenarkan sebarang aktiviti melombong dijalankan di kawasan tersebut. "Kedudukan turun naik paras air dan nilai flora fauna harus dikaji dengan teliti bagi memastikan ia selamat dan tidak membina sakan kawasan Paya Indah Wetlands," katanya. Menurut beliau, Wetlands juga merupakan tempat tadahan air hujan kerana kawasannya mampu menakung air dan jika aktiviti tersebut terus berleluasa, air di kawasan tersebut akan kering.

13 Julai 2010 (Selasa)

Kerajaan negeri salahkan media

SHAH ALAM 13 Julai - Kerajaan negeri hari ini menyalahkan media berhubung laporan wujudnya aktiviti perlombongan pasir tidak terkawal di Bukit Changgang, Dengkil, Ahad lalu. Exco Pemodenan Pertanian, Pengurusan Sumber Alam dan Pembangunan Sumber Alam, Yaakop Sapari berkata, laporan media mengenai kegiatan itu adalah tidak benar kerana lombong pasir berkenaan dijalankan secara sah dan diuruskan oleh syarikat milik kerajaan negeri, Kumpulan Semesta Sdn. Bhd. (KSSB). Tidak cukup dengan itu, Yaakop turut menuduh pihak media sebagai ejen kepada parti politik tertentu untuk melaporkan aktiviti perlombongan berkenaan yang kononnya bagi menjatuhkan pentadbiran kerajaan negeri pimpinan pakatan pembangkang di Selangor. "Tindakan media menyatakan kenyataan serta gambar lokasi perlombongan yang tidak benar. Aktiviti perlombongan yang dijalankan adalah sah serta diuruskan oleh KSSB," katanya ketika sesi penggulungan bajet tambahan peruntukan pembangunan 2010 pada sidang DUN di sini hari ini. Bagaimanapun, kenyataan Yaakop itu merujuk lombong pasir berkenaan di kawasan Olak Lempit dan bukannya di Bukit Changgang seperti yang dilaporkan media Ahad lalu.

Laporan media itu dibuat hasil daripada pendedahan Ketua Pembangkang negeri, Datuk Seri Dr. Mohamad Khir Toyo mengenai kegiatan perlombongan pasir secara tidak terkawal apabila 20 hektar tanah di Bukit Changgang terletak kira-kira 50 meter dari Taman Rekreasi Paya Indah Wetlands di Dengkil diceroboh untuk tujuan itu. Malah, aktiviti yang dipercayai di atas tanah milik kerajaan itu berlangsung sejak dua minggu lalu dan dikatakan telah mengeluarkan 10 juta tan metrik pasir dianggarkan bernilai RM220 juta. Malah menurut Mohamad Khir, lombong berkenaan dikatakan bukan satu-satunya kawasan tanah milik kerajaan yang diceroboh untuk aktiviti tersebut sebaliknya masih wujud di beberapa daerah lain. Dalam pada itu, **Yaakop (PKR-Kota Anggerik)** turut menggesa agar media yang melaporkan aktiviti perlombongan pasir di kawasan itu supaya membuat permohonan maaf kepada kerajaan negeri. "Kita juga minta pihak berkenaan supaya menarik kenyataan tersebut serta membuat permohonan maaf kepada kerajaan negeri. "Sekiranya mereka enggan berbuat demikian, saya minta supaya KSSB membuat laporan polis serta mengambil tindakan saman terhadap pihak terbabit," ujarnya.

13 Julai 2010 (Selasa)

Penduduk minta MB Selangor siasat

Oleh AZIAN AZIZ pengarang@utusan.com.my

SHAH ALAM 13 Julai – Penduduk Kampung Bukit Changgang meminta Menteri Besar, Tan Sri Abdul Khalid Ibrahim datang sendiri ke lokasi aktiviti melombong pasir berdekatan Paya Indah Wetlands di Dengkil, Sepang dekat sini bagi melihat senario yang berlaku di kawasan itu. Ini kerana, mereka keliru dengan kenyataan Abdul Khalid yang mengatakan lombong tersebut beroperasi secara sah sedangkan tiada pemberitahuan dibuat kepada penduduk kampung termasuk tiada papan tanda yang dipasang di situ bagi membuktikannya. Mereka juga musykil bagaimana aktiviti perlombongan di situ yang telah mencemarkan kolam-kolam ikan yang diusahakan penduduk kampung, diluluskan oleh Jabatan Alam Sekitar (JAS). Pengurus Belia Kampung Bukit Changgang, Bahaman Ahmad Jiman berkata, beliau tidak nampak sebarang papan tanda di kawasan sekitar lombong yang memberitahu aktiviti perlombongan di situ. Sehubungan itu katanya, beliau keliru sama ada aktiviti perlombongan di situ dilakukan secara sah seperti yang didakwa oleh Abdul Khalid. "Kalau sah kenapa perkara itu tidak dimaklumkan kepada penduduk kampung dan kalau lombong tersebut telah beroperasi sejak Januari kenapa ia tidak nampak macam lombong lama.

"Saya dan penduduk kampung keliru. Jadi kami minta jasa baik Menteri Besar agar memberi penjelasan kepada kami dan minta beliau siasat adakah maklumat yang diterima beliau itu tepat atau tidak. "Ini kerana terdapat banyak lombong pasir di Mukim Tanjung 12 dan Olak Lempit dan Bukit Changgang terletak di dalam mukim itu," kata beliau ketika dihubungi di sini hari ini. Katanya, Menteri Besar Selangor itu perlu segera bertindak sekiranya beliau prihatin dengan masalah penduduk kampung yang bimbang lama-kelamaan kawasan Mukim Tanjung 12 akan ditenggelami air. Abdul Khalid semalam memberitahu, kegiatan melombong pasir dekat taman rekreasi Paya Indah Wetlands di bawah pengetahuan kerajaan negeri dan dikendalikan Kumpulan Semesta Sdn. Bhd. (KSSB). Beliau mendakwa, kegiatan tersebut mempunyai permit sah dan lokasi sebenarnya terletak di Kampung Olak Lempit di Mukim Tanjung 12, Kuala Langat bukannya di Bukit Changgang.

Menurut beliau, permit melombong pasir di kawasan itu dikeluarkan pentadbir tanah Kuala Langat sejak Januari 2010 selepas mendapat kelulusan Jabatan Alam Sekitar (JAS), Jabatan Pengairan dan Saliran, Jabatan Kerja Raya, Jabatan Mineral dan Geosains, Lembaga Urus Air Selangor (LUAS), Majlis Daerah Kuala Langat dan Pejabat Daerah dan Tanah Kuala Langat. Sementara itu, seorang lagi penduduk, Alfian Kassim, 37, berkata, dia hairan bagaimana lombong yang dikorek berhampiran taman rekreasi Paya Indah Wetlands tidak akan menyumbang kepada pencemaran. Katanya, rakan-rakannya yang mengusahakan ternakan ikan di kolam berdekatan merungut kerana tumbesaran ikan mereka terbantut akibat pencemaran hasil kegiatan perlombongan di situ. "Kami tidak akan bersuara kalau tiada perkara yang menimpa kami. Jadi saya sarankan agar satu sesi penjelasan tentang kewujudan lombong ini diberikan kepada penduduk kampung dan satu penyelesaian segera dibuat oleh kerajaan negeri," katanya.

Seorang lagi penduduk kampung, Mokhtar Mokhsin, 57, meminta Abdul Khalid mempertimbangkan supaya lombong dekat Paya Indah Wetlands ditutup bagi mengelakkan kemungkinan berlaku banjir besar di Kampung Bukit Changgang. Ini kerana, katanya, jika kawasan yang dikorek dipenuhi air dan melimpah, dikhawatiri akan memecahkan ban yang dibina di sempadan kampung dan sekali gus menyebabkan banjir. "Perkara ini akan menyusah dan menjadikan keselamatan orang kampung. "Saya minta Menteri Besar datang sendiri tengok dan kemudian buat pemantauan sebelum perkara yang buruk berlaku," katanya. Beliau juga turut melahirkan rasa hairan kerana jika aktiviti mengorek pasir di Paya Indah Wetlands itu sah, kenapa semua lori mengangkut pasir beroperasi pada waktu malam dan awal pagi sahaja.

13 Julai 2010 (Selasa)

Lombong pasir: Noh minta pihak berkuasa lihat sendiri



Noh Omar meninjau kerja-kerja mengorek pasir secara haram dari udara berhampiran Kampung Paya Indah, Dengkil, semalam. - utusan/Abd. Rahman Saleh

KUALA LUMPUR 13 Julai - UMNO Selangor mendesak pihak berkuasa melihat sendiri aktiviti melombong pasir di negeri itu dan mengambil tindakan sepatutnya kerana kegiatan tersebut dipercayai telah melanggar peraturan. Timbalan Pengerusi Badan Perhubungan UMNO Selangor, Datuk Seri

Noh Omar berkata, tinjauan yang dilakukannya dari udara hari ini mendapati, keluasan tanah yang terlibat adalah melebihi daripada yang dimohon kerajaan negeri. "Dalam permohonan yang dibuat, mereka kata 48 hektar tetapi tanah yang dilombong dipercayai lebih luas daripada itu," katanya pada sidang akhbar di Subang dekat sini hari ini. Beliau sebelum itu membuat tinjauan dari udara dengan menggunakan helikopter bagi meninjau kawasan Dengkil, Kuala Langat dan Batang Berjuntai yang didakwa aktif dalam kegiatan melombong pasir. Noh berkata, jika kegiatan melombong pasir tidak melebihi keluasan 50 hektar, pemohon tidak perlu menyediakan laporan Penilaian Kesan Alam Sekitar (EIA) yang merupakan undang-undang mengikat dan memantau segala kegiatan melombong pasir itu. "Memang benar mereka mempunyai kelulusan Pengurusan Alam Sekitar (EMP) untuk melakukan kegiatan itu daripada Jabatan Alam Sekitar (JAS). "Pemohon juga tidak perlu menyediakan laporan EIA atas sebab tertentu termasuk jika keluasan tanah yang dinyatakan itu tidak melebihi 50 hektar," katanya.

Beliau mendakwa, keadaan itu membolehkan pihak terbabit melakukan kegiatan melombong pasir tanpa dikawal oleh pihak berkenaan. Turut mengikuti tinjauan itu ialah Ahli Dewan Undangan Negeri (ADUN) Kuang, Abdul Shukor Idros. Tinjauan itu dilakukan berikutan dakwaan berlakunya kegiatan melombong pasir secara besar-besaran berdekatan taman rekreasi Paya Indah Wetlands, Dengkil yang dipercayai telah berlaku sejak dua minggu lalu. Semalam Menteri Besar Selangor, Tan Sri Abdul Khalid Ibrahim menyatakan, kelulusan untuk melombong di kawasan itu telah dikeluarkan oleh JAS, Jabatan Pengairan dan Saliran (JPS), Jabatan Kerja Raya (JKR), Jabatan Mineral dan Geosains, Lembaga Urus Air Selangor (LUAS), Majlis Daerah Kuala Langat dan Pejabat Daerah dan Tanah Kuala Langat. Katanya, kelulusan itu diberikan setelah JAS dan LUAS berpuas hati dengan EMP yang disediakan oleh Kumpulan Semesta Sdn. Bhd. (KSSB). Dalam pada itu Noh juga meminta kerajaan negeri memberi penjelasan tentang pelantikan syarikat kontraktor, Cheong Weng Trading untuk menjalankan kegiatan melombong pasir itu. "Adakah ia dipilih melalui tender terbuka atau tidak. Dulu mereka selalu mempersoalkan segala tindak tanduk kerajaan Barisan Nasional (BN) dan sekarang tindakan mereka lebih dahsyat. "Ke mana pula perginya hasil pendapatan daripada kegiatan melombong pasir itu," ujarnya. Dalam perkembangan sama katanya, UMNO Selangor akan menghantar memorandum bantahan kepada kerajaan negeri berhubung perkara itu Khamis ini. "Pemuda UMNO Sepang juga akan membuat laporan kepada polis dan Suruhanjaya Pencegahan Rasuah Malaysia (SPRM) bagi menyiasat keseluruhan kegiatan melombong pasir itu," katanya.

13 Julai 2010 (Selasa)

Kontraktor LCCT diminta henti beli pasir

KUALA LUMPUR 13 Julai - Kontraktor yang terlibat dalam projek Terminal Penerbangan Tambang Murah (LCCT) diminta berhenti membeli pasir daripada Kerajaan Negeri Selangor kerana kegiatan melombong pasir di negeri itu dipercayai tidak mengikut peraturan. Timbalan Pengerusi Badan Perhubungan UMNO Selangor, Datuk Seri Noh Omar berkata, beliau difahamkan pasir yang dilombong di kawasan berhampiran taman rekreasi Paya Indah Wetlands, Dengkil telah dijual kepada kontraktor yang menjalankan pembinaan LCCT. "Jika benar, kontraktor projek LCCT perlu menghentikannya. Ia boleh dianggap sebagai satu tindakan bersubahat," katanya pada sidang akhbar di Subang dekat sini hari ini. Beliau sebelum itu membuat tinjauan dari udara di kawasan didakwa berlaku kegiatan melombong pasir di Dengkil, Kuala Langat dan Batang Berjuntai. Turut mengikuti tinjauan itu ialah Ahli Dewan Undangan Negeri (ADUN) Kuang, Abdul Shukor Idros.

Beliau turut meminta Kementerian Pengangkutan melalui Jabatan Pengangkutan Jalan (JPJ) menyiasat dan mengawasi lori yang digunakan untuk mengangkut pasir dari lokasi kegiatan perlombongan itu. Mengulas lanjut, kata Noh, kontraktor LCCT perlu memberi kerjasama dalam usaha membanteras kegiatan yang didakwa tidak beretika itu. "Jika mereka tidak membelinya, sudah pasti kegiatan perlombongan ini dapat dikurangkan dan dihentikan serta-merta," ujarnya. Mengenai dakwaan kegiatan melombong pasir di kawasan Kuala Langat oleh Kerajaan Negeri Selangor bertujuan membangunkan kolam ternakan ikan pada masa depan, Noh berkata, ia hanya alasan kerajaan negeri. "Sebagai Menteri Pertanian, saya menyokong hasrat tersebut. Bagaimanapun, jika hendak melombong di tanah yang luas untuk membangunkan kolam ikan, saya rasa tidak perlu. "Ini kerana terdapat banyak kawasan lain yang boleh dibangunkan untuk ternakan ikan," ujarnya.

13 Julai 2010 (Selasa)

Selangor bakal kekurangan tanah akibat perlombongan pasir



Kerja mengorek pasir dilihat dari udara berhampiran Taman Wetland dekat Putrajaya, semalam.

SHAH ALAM 13 Julai - Bekas Menteri Besar, Datuk Seri Dr. Mohamad Khir Toyo bimbang negeri ini akan berdepan masalah kekurangan tanah untuk aktiviti pembinaan dan perindustrian pada masa depan jika aktiviti melombong pasir di negeri itu tidak dikawal. Beliau berkata, penduduk negeri ini daripada golongan miskin dan berpendapatan sederhana akan menghadapi masalah membeli kediaman kerana ketika itu harga rumah akan melambung tinggi. "Jika tanah yang ada terutama milik kerajaan terus dibenarkan untuk dikorek bagi mendapatkan pasir, apa lagi yang tinggal pada masa depan. "Selangor akan jadi negeri yang berlubang dan penduduk yang akan menanggung kesusahan," kata beliau ketika dihubungi di sini hari ini.

Sehubungan itu, Mohamad Khir mengulangi desakannya agar kerajaan negeri menghentikan kerja-kerja melombong pasir di tanah milik kerajaan. Menurut beliau, walaupun kerajaan negeri mengeluarkan permit untuk aktiviti perlombongan di tanah milik kerajaan, namun apabila pasir dikorek sedalam 40 meter dan kemudian dibiarkan tanpa sebarang aktiviti pemulihian akan memberi kesan kepada alam sekitar. Jelasnya, kerajaan negeri tidak harus tamak untuk mengaut keuntungan melalui aktiviti perlombongan pasir kerana berdasarkan kajian yang dilakukan, pasir yang dilombong di tanah persendirian sudah cukup untuk diguna bagi tujuan pembangunan di negeri itu. "Sekarang ini orang berebut mahu melombong pasir di tanah kerajaan negeri kerana mereka tidak perlu bayar premium sebaliknya hanya bayar doket pasir yang jauh lebih murah berbanding premium," katanya.

Beliau menegaskan, lokasi melombong pasir yang ditunjukkan kepada rombongan media Ahad lalu adalah di Kampung Bukit Changgang dan bukan Kampung Olak Lempit sebagaimana didakwa Abdul Khalid. Semalam, Abdul Khalid memberitahu, kegiatan melombong pasir dekat taman rekreasi Paya Indah Wetlands adalah di bawah pengetahuan kerajaan negeri dan dikendalikan Kumpulan Semesta Sdn. Bhd. (KSSB). Beliau mendakwa, kegiatan tersebut mempunyai permit sah dan lokasi sebenarnya terletak di Kampung Olak Lempit di Mukim Tanjung 12, Kuala Langat dan bukannya di Bukit Changgang. Menurut beliau, permit melombong pasir di kawasan itu dikeluarkan pihak pentadbir tanah Kuala Langat sejak Januari 2010 selepas mendapat kelulusan Jabatan Alam Sekitar (JAS), Jabatan Pengairan dan Saliran (JPS) dan Jabatan Kerja Raya (JKR). Ia juga dikatakan mendapat kelulusan Jabatan Mineral dan Geosains, Lembaga Urus Air Selangor (LUAS), Majlis Daerah Kuala Langat serta Pejabat Daerah dan Tanah Kuala Langat.

13 Julai 2010 (Selasa)

Parlimen - RM3.042 bilion subsidi bahan api nelayan sejak 2006

KUALA LUMPUR 13 Julai - Sebanyak RM3.042 bilion subsidi untuk diesel dan petrol telah disalurkan kerajaan kepada golongan nelayan di seluruh negara sejak 2006 dalam usaha meningkatkan taraf hidup mereka. Menteri Pertanian dan Industri Asas Tani, Datuk Seri Noh Omar berkata, nilai itu mewakili 4.661 bilion liter diesel dan 314.549 juta petrol yang ditanggung kerajaan sejak 2006 sehingga tahun ini. Katanya, pemberian subsidi diesel dan petrol kepada nelayan telah memberi manfaat besar buat mereka terutama nelayan tradisional dari segi pengekalan daya saing dan keupayaan meraih pulangan pendapatan yang baik. Selain itu menurutnya, pemberian subsidi kedua-dua jenis bahan bakar itu juga memastikan golongan nelayan tradisional turun ke laut memandangkan kos bahan api merupakan 70 peratus daripada kos operasi penangkapan ikan.

"Dalam tempoh 2006 sehingga 2010, sebanyak 6.0975 juta tan metrik ikan telah didaratkan dengan nilai RM36.45 bilion," katanya menjawab soalan **Datuk Sapawi Ahmad (BN-Sipitang)** pada sidang Dewan Rakyat hari ini. Sementara itu, Noh menjelaskan, kementeriannya kini sedang mengkaji penggunaan sistem pengesanan khas bagi memantau kegiatan menangkap ikan menggunakan pukat tunda terutama di perairan larangan. "Jika sistem itu berjaya digunakan nanti, saya yakin masalah berbangkit mengenai pencerobohan kawasan perikanan menggunakan pukat tunda akan dapat diselesaikan," ujarnya.

14 Julai 2010 (Khamis)

Lombong pasir: PM harap Selangor ambil tindakan

PUTRAJAYA 14 Julai - Datuk Seri Najib Tun Razak berharap kerajaan Selangor mengambil tindakan bagi mengatasi masalah melombong pasir yang tidak terkawal di negeri berkenaan kerana isu itu menimbulkan kemarahan rakyat. Perdana Menteri berkata, kerajaan Selangor yang mempunyai bidang kuasa terhadap perkara itu, sepatutnya memantau isu tersebut dan mengambil keputusan dengan tidak membenarkan kegiatan berkenaan dijalankan kerana ia boleh menjelaskan dengan teruk keadaan muka bumi di negeri itu.

"Saya berharap kerajaan negeri (Selangor) akan mengambil tindakan untuk memulihkan keadaan ini sebab isu ini telah menimbulkan kemarahan rakyat. "Rakyat Malaysia yang melihat (isu) ini sebagai satu kelemahan besar yang dilakukan oleh pihak kerajaan negeri (Selangor)," katanya kepada pemberita selepas majlis perhimpunan bulanan, penyampaian Anugerah Khidmat Cemerlang 2009 dan Penganugerahan Pembaharuan Pensijilan 5S Perbendaharaan Malaysia di sini hari ini. - Bernama

15 Julai 2010 (Khamis)

Pasir: Selangor didesak laksana 7 tindakan

Oleh AZIAN AZIZ pengarang@utusan.com.my

SHAH ALAM 15 Julai – Kerajaan negeri didesak melaksanakan tujuh tindakan bagi menyelesaikan isu mengorek pasir yang memusnahkan alam sekitar yang dikhuatiri membawa bencana kepada negeri itu. Desakan itu dibuat UMNO Selangordan Pertubuhan Pribumi Perkasa Malaysia (Perkasa) negeri dalam satu memorandum kepada Menteri Besar, Tan Sri Abdul Khalid Ibrahim yang diserahkan kepada wakilnya, Azman Abidin. Ia diserahkan Ahli Jawatankuasa Badan Perhubungan UMNO negeri, Datuk Ismail Kijo di pekarangan bangunan Setiausaha Kerajaan Negeri (SUK) di sini hari ini.

Tujuh tindakan yang dinyatakan dalam memorandum itu adalah:

- * Menghentikan serta merta semua permit dan aktiviti perlombongan pasir di atas tanah kerajaan dan persendirian yang melanggar syarat.
- * Menghentikan dan membatalkan semua permit pengeluaran pasir di kawasan yang tidak sesuai dan boleh membawa kemusnahaan alam sekitar serta bencana kepada negeri Selangor.
- * Menyediakan kertas putih masalah pengurusan dan operasi industri pasir di Selangor termasuk operasi Kumpulan Semesta Sdn. Bhd. (KSSB).
- * Menarik balik serta merta kuasa monopoli KSSB dan menyerahkannya semula kuasa pengendalian galian dan mineral termasuk pasir kepada jabatan-jabatan kerajaan yang berkaitan.
- * Menamatkan perkhidmatan Ahli Lembaga Pengarah KSSB dan mengambil tindakan disiplin kepada mana-mana pegawai dan kakitangannya yang terbukti menyalahgunakan kuasa dan menyeleweng selain menghentikan pemberian bonus kepada mereka.
- * Memantapkan pasukan penguat kuasa yang dianggotai jabatan-jabatan kerajaan negeri dan Persekutuan yang berkaitan, dan
- * Menubuhkan segera Jawatankuasa Bertindak yang bertanggungjawab dalam program pemulihan lombong-lombong pasir di seluruh negeri.

Sebelum itu, lebih 300 ahli UMNO, Perkasa, Majlis Gabungan Pertubuhan Sukarela dan Majlis Belia Selangor berarak sejauh 500 meter untuk menghantar memorandum tersebut kepada Abdul Khalid. Mereka berkumpul di kawasan masjid negeri kira-kira pukul 11.15 pagi sebelum berarak ke bangunan SUK dengan diketuai Exco Pemuda UMNO, Lokman Nor Adam. Mereka membawa kain rentang yang mengkritik kerajaan negeri dan Kumpulan Semesta Sdn. Bhd. (KSSB) antaranya ‘Harapkan pagar, pagar makan padi’ dan ‘RM50 juta pasir mana dia’, mereka turut melaungkan ‘Hancur PKR’. Sebelum kumpulan itu tiba di pekarangan SUK, pasukan yang dikenali sebagai Selkad (Sekretariat Latihan dan Perkaderan) berkumpul kira-kira pukul 10.30 pagi untuk menyatakan sokongan kepada kerajaan negeri dan Abdul Khalid.

Selepas kumpulan itu tiba, Ketua Pemuda UMNO Selangor, Shuhaimi Ghazali membacakan isi kandungan memorandum, suasana menjadi kecoh apabila kedua-dua pihak saling mengejek antara satu sama lain. Sementara itu, Ketua Polis Daerah Shah Alam, Asisten Komisioner Nor Azam Jamaluddin yang ditemui berkata, tiada perkara tidak diingini berlaku sepanjang sesi penyerahan memorandum kepada kerajaan negeri hari ini. Katanya, walaupun berlaku sedikit kekecohan tetapi kedua-dua pihak terutama yang menyerahkan memorandum memberikan kerjasama kepada pihaknya.

15 Julai 2010 (Khamis)

Tanah milik Kerajaan Persekutuan diceroboh pencuri pasir



Muhammad Farid Saad menunjukkan kawah yang terhasil berikutan kegiatan mencuri pasir di tapak projek Politeknik Balik Pulau, semalam.

BALIK PULAU 15 Julai - Jika di Selangor kegiatan melombong pasir di tanah milik kerajaan negeri dan individu berlaku secara berleluasa tanpa kawalan, di Pulau Pinang lain pula ceritanya. Di negeri ini, tanah milik Kerajaan Persekutuan pun diceroboh untuk mencuri pasir. Sikap kerajaan negeri yang seolah-olah tidak mengawasi kegiatan haram itu amat dikesali kerana ia boleh membantutkan projek untuk rakyat yang dirancang dalam Rancangan Malaysia Kesepuluh (RMK-10). Ahli Dewan Undangan Negeri (ADUN) Pulau Betong, Muhammad Farid Saad berkata, disebabkan tiada pemantauan oleh agensi-agensi di bawah kerajaan negeri, tapak projek pembinaan Politeknik Balik Pulau menjadi mangsa kegiatan curi pasir sejak seminggu lalu. "Saya amat berharap Pejabat Daerah dan Majlis Perbandaran Pulau Pinang (MPPP) turun padang membuat pemantauan dan bertindak tegas terhadap mereka yang mencuri pasir ini," katanya.

Beliau ditemui selepas meninjau tapak projek pembinaan Politeknik Balik Pulau berdekatan Kampung Sungai Burung di sini yang diceroboh pencuri pasir. Akhbar hari ini melaporkan, kegiatan membawa keluar pasir menggunakan lori dari kawasan berkenaan dilakukan selepas maghrib sehingga subuh, dipercayai bagi mengelak dikesan pihak berkuasa dan penduduk kampung. Setiap malam, berpuluhan-puluhan lori keluar masuk di kawasan itu mengambil pasir untuk dihantar ke lokasi yang tidak dipastikan.

15 Julai 2010 (Khamis)

Tindakan Selangor heret Pusat dipersoal

Oleh ABDUL YAZID ALIAS pengarang@utusan.com.my

SHAH ALAM 15 Julai - Bekas Menteri Besar, Datuk Seri Dr. Mohamad Khir Toyo hari ini mempersoal tindakan kerajaan negeri yang cuba mengheret Kerajaan Persekutuan dalam isu pasir di Selangor ketika ini. Beliau berkata, tindakan mengemukakan surat kepada Timbalan Perdana Menteri, Tan Sri Muhyiddin Yassin serta beberapa agensi kerajaan untuk menangani masalah kecurian pasir negeri itu tidak sepatutnya dilakukan kerana ia di bawah bidang kuasa kerajaan negeri. Ini kerana, katanya, penguatkuasaan dalam aktiviti perlombongan pasir secara haram atau yang tidak berkawal di beberapa lokasi di Selangor seharusnya dilaksanakan oleh kerajaan negeri sendiri melalui agensi penguat kuasanya seperti Pejabat Tanah dan Galian (PTG). Lebih menghairankan, katanya, meskipun kerajaan negeri mengetahui beberapa lokasi kecurian pasir di negeri itu namun tiada sebarang tindakan dilakukan di lokasi-lokasi berkenaan.

"Kenapa kerajaan negeri hendak membabitkan Kerajaan Persekutuan dalam hal ini, mereka ada kuasa dan seharusnya mereka laksanakan usaha penguatkuasaan. "Kerajaan negeri kata mereka tahu lokasi-lokasi kecurian pasir di negeri ini dan kenapa sehingga kini mereka tidak mengambil tindakan mengikut undang-undang yang ada," katanya kepada pemberita selepas sidang Dewan Undangan Negeri (DUN) di sini hari ini. Semalam, Menteri Besar, Tan Sri Abdul Khalid Ibrahim cuba melibatkan Kerajaan Pusat dalam kontroversi perlombongan pasir di negeri itu apabila mengemukakan surat dan penjelasan kepada Muhyiddin bagi meminta kerjasama untuk membantu menyelesaikan isu tersebut.

15 Julai 2010 (Khamis)

Rugi: PAC tegur SPNB

KUALA LUMPUR 15 Julai - Jawatankuasa Kira-Kira Wang Negara (PAC) menegur Syarikat Prasarana Negara Berhad (SPNB) kerana banyak mengambil tindakan yang bukan sahaja merugikan syarikat itu malah turut menjelaskan infrastruktur pengangkutan awam negara. Laporan siasatan mengenai syarikat milik penuh kerajaan itu diedarkan di Parlimen hari ini. Ia dibuat ekoran Laporan Ketua Audit Negara 2008 yang antara lain menegur prosedur pelupusan aset oleh SPNB termasuk rancangannya melupuskan 1,139 badan bas yang kini tersadai di depoh bas di Serendah dan Sungai Buaya. Laporan Ketua Audit Negara itu menyebut, 459 (40.3 peratus) daripada 1,139 bas yang dijadual untuk dilupuskan masih boleh diperbaiki, sama ada perlu pembaikan bahagian enjin, bahagian badan atau aksesori bas. Penggerusi PAC, Datuk Seri Azmi Khalid menggariskan lapan pandangan dan syor yang perlu diambil kira oleh kerajaan dan syarikat berkenaan untuk tindakan lanjut.

15 Julai 2010 (Khamis)

Parlimen - Pecat Nor Yakcop, Zarinah

KUALA LUMPUR 15 Julai – Perdana Menteri diminta supaya memecat Menteri di Jabatan Perdana Menteri, Tan Sri Nor Mohamed Yakcop dan Pengurus Suruhanjaya Sekuriti, Tan Sri Zarina Anwar daripada portfolio masing-masing ekoran penjualan dan pembelian saham berkepentingan negara beberapa tahun lalu. Wee Choo Keong (Bebas-Wangsa Maju) berkata, sebagai contoh, pengambilalihan Hospital Pantai daripada Pantai Holdings Bhd. (Pantai) oleh syarikat Singapura, Parkway Holdings Ltd. (Parkway) pada 2005 melalui pembelian saham bernilai RM312 juta sepatutnya tidak berlaku dan dihentikan oleh Suruhanjaya Sekuriti. Lebih mengejutkan, dakwa beliau, penguasaan Pantai kemudiannya ditebus (bail out) oleh Khazanah Holdings Bhd. (Khazanah) selepas Nor Yakcop menyatakan pengambilalihan bernilai RM800 juta itu bukannya satu penebusan, sebaliknya merupakan kesediaan pembeli dan penjual dalam pasaran.

“Ini adalah kenyataan bekas Menteri Kewangan II (Nor Yakcop) yang memperbodohkan rakyat Malaysia. Khazanah terpaksa membayar RM800 juta untuk mengambil alih Pantai daripada Parkway. “Tidak semena-mena sebuah syarikat asing (Parkway) membuat keuntungan sebanyak RM500 juta daripada wang rakyat dan lebih teruk, Khazanah tidak menguruskan Hospital Pantai sebaliknya melantik Parkway menguruskannya. Mengapa?” tegasnya. Beliau percaya ia berlaku dengan pengetahuan Nor Yakcop dan Zarina. Beliau berkata demikian semasa membahaskan Rang Undang-Undang Antipemerdagangan Orang (Pindaan) 2010 di Dewan Rakyat hari ini. Selain dakwaan itu, Choo Keong memberitahu, Nor Yakcop dan Zarina juga perlu dipecat kerana:

* Nor Yakcop mempunyai sekurang-kurangnya 500 peti besi mengandungi wang tunai berikut setiausaha politiknya, Hasbie Satar ditahan Suruhanjaya Pencegahan Rasuah Malaysia (SPRM) selepas didapati menyimpan 48 peti besi mengandungi wang tunai.

* Pelupusan 10 peratus saham Telekom Bhd. yang dijual kepada syarikat Singapura, Temasek Holdings dan tindakan Maybank Bhd. membeli saham Bank International Indonesia pada harga yang amat tinggi.

* ‘Gangguan’ terhadap empat wartawan perniagaan berkaitan penjualan saham Kenmark Industrial Co. (M) Bhd. bertujuan melindungi skandal Zarina dan suaminya, Datuk Azizan Abdul Rahman.

Choo Keong mendakwa kes-kes tersebut membuktikan Nor Yakcop dan Zarina sengaja ‘membutakan’ mata untuk melindungi para pengkhianat serta perompak negara. “Ini adalah contoh klasik kepada peribahasa Melayu, harapkan pagar, pagar makan padi,” tegasnya.

15 Julai 2010 (Khamis)

Rencana- Jangan kerana pasir alam sekitar dikorbankan

DEMAM Piala Dunia baru sahaja berakhir. Kini, isu korek pasir pula hangat diperkatakan. Isu tersebut begitu cepat meraih perhatian umum sejak kebelakangan ini memandangkan ia melibatkan kelangsungan masa depan alam sekitar dan juga penghuni di dalamnya. Kegiatan melombong pasir yang sedang giat dijalankan kira-kira 50 meter daripada taman rekreasi Paya Indah Wetlands begitu menggusarkan hati penduduk sekitar. Ini kerana, ia dikuatirikan akan memberi implikasi negatif kepada ekosistem dan alam sekitar jika ia dikendalikan tanpa mematuhi garis panduan yang telah ditetapkan oleh pihak berwajib. Walaupun kegiatan perlombongan pasir yang dikendalikan oleh Kumpulan Semesta Sdn. Bhd. (KSSB) itu mempunyai permit yang sah, namun ia tetap menimbulkan ketidakpuasan hati pelbagai pihak lantaran lokasi kegiatan tersebut yang terlalu hampir dengan taman rekreasi Paya Indah Wetlands. Malah, permit yang dikeluarkan oleh pentadbir tanah Kuala Langat selepas mendapat kelulusan daripada beberapa jabatan (seperti Jabatan Alam Sekitar (JAS), Jabatan Pengairan dan Saliran, Jabatan Kerja Raya, Jabatan Mineral dan Geosains, Lembaga Urus Air Selangor (LUAS), Majlis Daerah Kuala Langat dan Pejabat Daerah dan Tanah Kuala Langat) itu terus menjadi pertikaian pelbagai pihak atas nama ‘melindungi alam sekitar’.

Namun, persoalannya sejauh manakah polemik demi polemik berhubung isu tersebut benar-benar untuk memperjuangkan nasib alam sekitar? Jika isu tersebut benar-benar dicanang atas dasar menjaga kepentingan alam sekitar, maka ia seharusnya diperhalusi agar pertimbangan yang sewajarnya dapat dilakukan. Ini kerana, sikap menuding jari menyalahkan antara satu sama lain semata-mata tidak akan mampu menyelesaikan permasalahan tersebut. Sebaliknya, ia akan lebih memburukkan lagi keadaan. Oleh yang demikian, isu ini perlu dilihat secara menyeluruh merangkumi pelbagai aspek tanpa didalangi unsur-unsur yang tidak sepatutnya seperti untuk kepentingan individu atau pihak-pihak tertentu sahaja. Sebaliknya, ia perlu dilihat sebagai isu bersama tanpa mengira latar belakang dan kepentingan politik masing-masing. Ini memandangkan, ia merupakan isu besar yang perlu dipandang serius oleh semua pihak kerana ia melibatkan masa depan alam sekitar dan juga habitat flora serta fauna. Justeru, ia perlu dikaji sedalam-dalamnya sebelum sesuatu keputusan atau kata sepakat diambil demi kepentingan bukan sahaja alam sekitar, bahkan juga semua makhluk yang menghuninya. Jika diamati sedalam-dalamnya, keimbangan penduduk di sekitar kawasan perlombongan tersebut adalah berasas.

Ini memandangkan sejak kegiatan perlombongan pasir itu dijalankan, mereka telah terdedah kepada pelbagai kesan sampingan seperti pencemaran air, udara dan juga bunyi. Situasi ini akan memberi implikasi yang tidak sihat kepada persekitaran hidup mereka. Jika kegiatan perlombongan tersebut dibiarkan berlanjutan, ia akan menjelaskan tahap serta kualiti kesihatan penduduk sekitar ekoran terdedah kepada debu, habuk dan juga sumber air yang tercemar. Malahan, pencemaran air, udara dan bunyi yang berpunca daripada jentera melombong serta mencuci pasir juga akan turut mengancam habitat burung air yang menjadi antara salah satu daya tarikan di taman rekreasi itu. Selain itu, bunyi bising daripada jentera yang menjalankan kerja-kerja mengorek pasir akan memungkinkan berlakunya migrasi unggas terutamanya spesies tempua dan puchong serandau ke tempat lain. Apabila berlakunya migrasi secara berterusan, ia akan menyebabkan spesies unggas di kawasan berkenaan akan berkurangan. Ini akan memberi implikasi yang buruk kepada taman rekreasi berkenaan lantaran keunikan taman yang semakin terhakis dan kekayaan spesies yang kian berkurang. Bahkan, tidak mustahil jika situasi ini dibiarkan berlanjutan ia akan turut mengancam spesies hidupan liar lain yang menghuni taman ini.

Apabila habitat dan sistem ekologi di kawasan terbabit terganggu, pastinya ia turut akan menjelaskan kawasan pembiakan kebanyakan spesies hidupan liar dan unggas yang terdapat di kawasan rekreasi itu. Keadaan ini sekali gus akan meletakkan spesies-spesies berkenaan dalam situasi bahaya. Malah, lebih buruk lagi ia akan mendedahkan spesies-spesies berkenaan kepada ancaman kepupusan. Apabila keadaan ini berlaku, ia pastinya akan menggagalkan matlamat awal penubuhan taman rekreasi tersebut yakni untuk mengekalkankekayaan serta kepelbagaiannya spesies flora dan fauna demi kepentingannya sebagai pusat ekopelancongan utama di Malaysia. Jika kawasan ekopelancongan ini terjejas, ia sekaligus akan turut memberi implikasi ekonomi yang besar kepada negara. Selain memberi kesan negatif kepada spesies hidupan liar, ia juga akan memberi kesan yang serius ke atas bentuk muka bumi di kawasan terbabit. Misalnya, ia akan menyebabkan struktur tanah menjadi tidak stabil dan kemungkinan berhadapan dengan tanah runtuh dan jerlus adalah tinggi. Malah, jika kegiatan tersebut dibiarkan berlanjutan ia akan meninggalkan lompong besar yang sukar dipulihkan apabila operasi berakhir.

Ini akan mencatatkan pemandangan di kawasan tersebut dan sekaligus akan mengubah landskap Paya Indah Wetlands. Jika ingin dipulihkan, ia mungkin memerlukan belanja yang lebih besar daripada kos untuk kerja-kerja perlombongan itu sendiri. Jadi, langkah pemulihan ke atas tapak-tapak tinggalan perlombongan tersebut kelak hanya akan merugikan negara semata-mata. Melihat kepada implikasi-implikasi buruk yang timbul akibat kegiatan perlombongan tersebut, kelulusan yang dikeluarkan ke atas tapak perlombongan itu seharusnya dipertimbangkan kembali. Perkara ini sewajarnya diperhalusi dengan sedalam-dalamnya agar ia mengambil kira kesemua faktor dan adil kepada semua pihak termasuk alam sekitar, flora serta fauna, masyarakat dan juga negara. Jika belum pun siap sepenuhnya projek fasa pertama, kita sudah nampak implikasi negatifnya. Jadi, bagaimanakah pula jika diteruskan untuk projek fasa kedua kelak? Ia pastinya akan memberi kesan yang lebih buruk lagi kepada alam sekitar dan ekosistem seluruhnya. Sehubungan itu, diharap pihak berwajib dapat mengkaji dan memperhalusi semula kewajaran permit yang telah dikeluarkan untuk projek perlombongan pasir berkenaan. Jangan kerana mengejar wang ringgit semata-mata, maka kepentingan alam sekitar dikorbankan. Sama-sama lah kita renungkan. Mudah-mudahan kita menjadi seorang insan yang tahu erti ‘bersyukur’. Apabila kita kenal nilai dan erti syukur, kita pastinya akan dekat dengan Allah. Dan apabila kita dekat dengan Allah, ia akan menjadi tunjang kekuatan kita untuk menggapai kejayaan dalam menjalankan peranan kita sebagai hamba dan khalifah Allah untuk memakmurkan bumi serta menjaga amanah alam dengan sebaik-baiknya.

PENULIS ialah Pegawai Penyelidik, Pusat Kajian Sains dan Alam Sekitar Institut Kefahaman Islam Malaysia (IKIM)